

# Иньгүдин нәр

Элстин негдгч номертә дундин школиг урднь төгскен сургъульчнрин джил болгън харгъдж кедг нәр болв.

Эн нәарт 1945 джиләс нааран эн школд сургъуль сурсн институтд болн техникумд дасджах студентнр, дакад школ төгскәсн производствд кәдлджәх багъчуд ирцхәв.

Ик оньгтагъар керүлсн брәд хурджах әмтс нәр эклхиг байртагъар тосв. „Эдн мана школд дасцхала“,—гисн мон-аж ирсн улсд икәр таасгдв. Герүнд школ сәәнәр төгскәсн сургъульчнрин зургуд бәәнә.

Школд урднь багшлдж бәәнсн, ода пенсд гарсн кәгшн багш Татьяна Ивановна Титова, дуудснд ирәд, эврәннь дасхдж йовсн сургъульчнриг ик медрлтә, сән эрдмтә болцхатн гидж йбрәв.

Багшнрин коллективин нерн деерәс школин директор Булакова Антонина Васильевна ирсн улсиг йбрәв.

—Үнтә үүрмүд, мана школд дассн сургъульчнр! Бидн тәдниг кезәд болвчн ирхитн күләнәвдн, манд ягъдж дасджахан, ягъдж кәдлджәхән бичн йацхәтн. Тәрскндән туста брдүд болцхатн,—гидж школин директор үгән төгскв.

Производство кәдлджәх школ төгскен сургъульчнрас Николай Резников үг келв.

—Эн джил арвдгч класс төгскәх сургъульчнр производствд ордж кәдлхәсн бичә әәтн. Кәдлмшәр дамждад ах сургъульд орхла медрл бат болхмн. Хату-мөтүггәс әәхмн биш, комсомольск зәргтәгъәр кәдлмш дасхмн,—гидж Резников келв.

Валентина Добронравова, Светлана Бархотова, Сергей Воронцов, нань чигн студентнр дурта профессиннь тускар келцхәв, тедн геолог, механизатор, агроном, багш, конструктормуд болх күслтә.

Эн джил арвдгч класс төгскәх Тамара Литвиненко эврәннь үүрмүдиннь, хамдан дасджах сургъульчнрин ухан-зедкл келв, производствд кәдлхдән әәшговдн гив.

Күүндврин сүүләр арвдгч классин сургъульчнр концерт үзүлв. Ирсн гиичнрт-студентнрт нерәддж „Ни пуха, ни пера“ гидг ду дуулцхав.

Сургъульчнрин эн нәр йир сән болв.

Алла ЭРДНИЕВА.